

Hallelujah- Weihnachten 2023

- Optimist Wow... händ ihr die Sternschnuppe gseh?
- Pessimist ng hmhhh... (nachdenklich traurig)
- Kind 3 Ohaaa... Du bisch aber nöd so chillig druff hüt... Alles guet?
- Pessimist Guet isch e Cremeschnitte...
- Kind 4 Okeee... also chum, ruck use... was isch los
- Pessimist Irgendwie isch doch das alles en Witz... Häsch dich scho mal ume glueget? I de Schuel verprüglets sich, will em einte sini ander Nase nöd passt, mini Kolleginne händ grad Krach will die eint lversüchtig isch, dass die ander mit de falsche Lüüt guet uschunnt – und bi de Grosse isch es im Fall au nöd vill besser... Die striitet genau gliich und das nännt mer dänn Chrieg
- Pragmatiker Ja... so isch halt d Wält
- Pessimist Dänn isch es ebe doch en Witz. Hüt isch Heilig Abig und sit 2000 Jahr verzellt mer sich, dass a Wiechnacht Friede uf d Erde cho isch. Und sit 2000 Jahr verpüglet sich Mänsche wäg irgend eme doofe Grund. Es isch wiit und breit kei Friede in Sicht.
- Witzbold Also, wänn ich Playstation 5 hüt Abig überchum, dänn fühlt sich das scho rächt nach Friede a...
- Pessimist Ha, ha... Und was verzellsch dene, wo uf de Flucht vor Chrieg sind? Und was verzellsch dene, wo die Nacht verusse schlafed will sie keis Dehei händ?
- Witzbold Isch dänk nöd Ernst gsi mit de Playstation... Aber häsch wüirklich gmeint, vor 2000 Jahr segs besser gsi? Die händ mindestens so es Chaos gha wie mir hüt. Chumm... mir lueged mal i d Gschicht ine. Ich glaub, das mit em Friede hämmer irgendwie alli nonig so tschegged

Hallelujah

- Pessimist Ggesch, es isch doch nur e Gschicht
- Pragmatiker Hä was, häsch es jetzt nöd tschägget?
- Pessimist Was sötti tschägget ha? En Maa, e Frau, es Baby und ganz viel Ängeli

Pragmatiker Ja scho, aber s Eigentliche stah zwüschet de Ziile

Pessimist Eigentlich bisch du mir chli z kompliziert

Pragmatiker Eigentlich isch es aber ganz eifach

Kind 3 Eigentlich?

Pragmatiker Eigentlich isch es eso, dass de Himmel zu dir und mir ja seit.
Er seit JA, häsch das ghört?

Kind 4 ja scho, und jetzt?

Pragmatiker Loset mir guet zue; Wänn Gott zu dir und mir ja seit, dänn seit er zu ALLNE ja.
Au zu dene wo andersch dänked als mir. Au zu allne Völker und Länder.

Kind 4 *Schaut in die Runde* - Und was wär dänn jetzt d Lösig nach euere Meinig?

Optimist Hä! Mir müend gar nüüt löse... Es langed, wänn mir Friede SIND... a eusem Ort, genau so wies de Jesus a sim Ort im Stall vo Bethlehem gsi isch. Das isch alles.

Pessimist Das isch alles?

Kind 3 Häsch rächt! Wänn mir tschegget, dass Gott zu allem i eus ja seit, wer chan dänn nei zu eus säge? Dänn chan ich Friede sii, und de langed für mini Wält

Pessimist Boahh... jetzt isch es glaub au bis zu mir cho! Und wänn das jede tschegged, und jede Friede ISCH, dänn langed de vielleicht ja sogar für die ganzi Wält?

Kind 4 Ihr sind zwar scho chli schrägi Vögel, aber ich säge ganz bestimmt ja zu eu!

Witzbold Schrägi Vögel? Das passt irgendwie 😊

Kind 3 Und ich säge au Ja zu eu

Alle andern ich au, ich au, ich ah...

Alle *geben sich die Hände*

Accapella

**Hallelujah, Hallelujah, Hallelujah, Halleluuujah
Hallelujah, Hallelujah, Hallelujah, Halleluuujah**